



林柏燕先生个一堂課

冬下个當晝，冷洩洩仔个便當食到人悶肚悶肚，二十零人个教室肚啄目睡个啄目睡、殯殯个殯殯。離上課還有成十分鐘仔，課務開始泡茶、同學這兜乜去淳兜仔燒滾水準備奮戰目睡蟲。半開个前門分佢影著：廊仔尾个玻璃門外，闊闊个草坪心，孤孤企等一隻身影，目光堅定瞇往遠位、獨享冷風。圖牆臂，滿樹苦楝子、青黃色个苦楝老樹恬恬仔摻佢講：「係今晡日个講師！」

佢輕腳躡到門前企正，頭那毛半白个先生撇轉頭，紳士个摻佢領頭，腳步並無停動。「先生！外背恁冷……」佢隨聲鑽入先生獨享个冷風肚，一霎時清風對腦凶灌入身體，爽快！先生睇了一下風向，徙一細步仔摻伸著兩口个煙嘔忒，悠悠淡淡个講「想起加拿大个寒天……」。學長看著高中个先生，行出來相認、請先生入屋肚。「噎哈！」暗噤个嗽聲，係肺管肚嗽毋出來个痰搞怪，佢知總个多嘴「先生怕食煙毋得？！」換來先生共樣知總个淺笑。老人家？無看著呢，係腳踏七十，穩重堅定个後生人。

「異早就分佢尋到這位，時間還早，想啲一杯咖啡。恁大恁闊个學校，看毋著賣咖啡个。二樓西餐廳總有？！就行上去，頭家也係北美轉來，毋過厥咖啡淨用餐附送，無單賣。哈哈，有就好，坐下來，付兩百零銀，啲一杯咖啡！」「無異好啲个咖啡！」「噫，無麼个香味，二樓个風景還做得。」「飯餐錢都付了，連水果也錫您毋著？！」「無需要，佢為著咖啡入去个。」哈哈，暢快个林柏燕先生，真歡喜認識您。

兩點鐘个課，哪有人盼得啄目睡？文學家、小說家、評論家，一儕儕仔分先生點名對書項行出來。大老？大文學家？大詩人？無呢，全部係活跳跳摻佢共樣會食飯、會分爺哀罵个老朋友。「新埔鎮誌」花恁多時間，寫到恁詳細、恁實用，愛紹介一下無？無分配恁多時間分自家个作品呢。最新長篇小說，用客語寫个「東城檔案」，該愛講一下：新竹，裝到淦淦个故事，少年个林柏燕先生，跳出來講課。可惜，第二年寒天又來，先生个人間旅行既經結束。

有兜人，都相領頭歸半生人了，還係毋多相識；也有人，一生人可能就一面之緣，就永久照亮人生个該隻時點。林柏燕先生个人生暢快，就深深印在該年个寒天。

作者：彭瑞珠

☆詞彙學習☆

【冷洩洩仔】lang' ved` ved` e`：冷颼颼。

【睇】lai`：看、眼珠子移動的看了一下。

【一霎時】id` sad` sii`：一瞬間、霎那。

【暗噤】em lem：隱隱的隆隆聲響，這裡指咳

【噎哈】ed hem`：咳嗽聲。

嗽聲。

☆文法學習☆

【怕】pa：副詞，大概、可能。表示對於事件的猜測。為加強語氣，可在句末加上「敢怕」。

例1：怕愛轉寒了，愛帶加兜仔衫。（可能要變冷了，要多帶些衣服。）

例2：佢怕無考好敢怕，幾下日都恬恬毋搭人。（他大概沒考好，好幾天都靜靜的不理人。）